

FÖGL D'INFUORMAZIUN „LEZCHAS“ (HAUSAUFGABEN)

Quist fögl d'infuormaziun dess muossar co cha la scoula da Sent va intuorn cun lezchas e che reglas chi vaglian in connex cun quellas. Il fögl es pensà sco agüd e sustegn per magistraglia, scolaras, scolars e genituors da tuot la scoula (1. – 9. classa).

Qualità

Lezchas pon esser lezchas preparatorias, d'imprender, da finir alch, d'exercitar, e.o.p. Lezchas dessan esser concipidas uschè, cha l'uffant es bun da tillas schoglier svesa, dimena sainza l'agüd dals genituors. Lezchas dessan promover pro'l singul uffant eir la cumpetenzza da s'organisar svesa. La magistraglia da la scoula da Sent evitescha lezchas dattas sü be per occupar las scolaras e'ls scolars. Las lezchas dessan avoir ün effet positiv sül imprender. Il singul uffant dess badair il progress ch'el fa fond lezchas da chasa.

Quantità

In regard quantità decida mincha magister/-ra individualmaing quantas lezchas chi fan dabsögn e quantas chi cumporta. La quantità da lezchas po variar ed es natüralmaing eir dependenta dal s-chalin da scoula. In general esa uschè, cha plü ot cha'l s-chalin da scoula es e daplü lezchas cha l'uffant survain. Sül s-chalin ot coordinescha la magistraglia lezchas e prouvas dovrend üna tabla da lezchas in mincha stanza da scoula.

Rolla da la magistraglia

Mincha magister/magistra es in dovair dad infuormar a las scolaras, als scolars ed als genituors co chi funcziuna cullas lezchas pro el/ella ill'instrucziun. Lezchas vegnan per regla controlladas, trattadas o discusas ill'instrucziun.

Lö da lavur a chasa e rolla dals genituors

Mincha scolar(-a) da la scoula da Sent stess avoir la pussibilità da far lezchas in ün lö per sai adattà. L'interess e la tenuta dals genituors invers la scoula ed invers las lezchas dal uffant han üna grond'influenza süls agens uffants, che chi nu voul però dir, cha'ls genituors hajan da surtour las lezchas da chasa da lur uffant(-s).

La magistraglia da la scoula da Sent